



Jens NapätôK'
Inatsisartuni ilaasortaq, Naleraq

§ 37 naapertorlugu apeqqummut nr. 157/2026-mut akissuteqaat.

Asasara Jens NapätôK'

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaakka. Apeqqutit issuarneqartarput tamatumalu kingorna akineqarlutik.

- 1. Paarlakaattartunik aqqissuussinerup siunertaa, inatsisitigut tunngavia, atuutilerfia piffissamullu killiliussaa suuppat, aammalu aqqissuussinermut atatillugu illuatungeriit sorliit isumaqatigiissuteqarsimappat?**

Akissut

Aningaasaqarnermut Akileraartarnermullu Naalakkersuisup danskit aningaasaqarnermut naalakkersuisuatalu peqqinnissaq pillugu isumaqatigiissutaasa ilaattut, Kalaallit Nunaata imminut napatittup pilersinnissaa pillugu Danmarkimi naalakkersuisut Kalaallilu Nunaanni Naalakkersuisut tunngaviusumik tunngavissatut isumaqatigiissuteqarput. Tamatumunnga atatillugu Kalaallit Nunaanni Peqqinnissaqarfik (Peqqinnissaqarfik) Danskillu Nunap Immikkoortuisa akornanni paarlakaattartunik aqqissuussinermut tapersiinissamut danskit aningaasaqarnermut inatsisaannit aningaasanik immikkoortitsisoqarpoq.

Peqqinnissaqarfimmi atorfinni ikittuni aalaakkaanerusunik, piukkunnaateqarnerusunik ataavannerusunillu sulisoqarnissamik pilersitsinissaa aqqissuussinermi siunertaavoq. Tamanna Danmarkimi napparsimmavissuit immikkoortortaqaarfiit peqqinnissaqarfinni sulisunik piffissamik killilikkamik atorfinitsitsisarneq pissaaq. Aqqissuussineq atorfinnik aalajangersimasunik sulisussanik inuttalernissaannik periarfissaqarfiusimanngitsunik ilaqqarpoq.

Paarlakaattartunik aqqissuussineq Peqqinnissaqarfiup Danskillu Nunap immikkoortuisa akornanni ataatsimut tunngaviusumik- aamma paaseqatigiinnissamut isumaqatigiissummik tunngaveqarpoq, taannalu 1. Septembari 2026-mi atuutilissaaq. Aqqissuussineq ataavartumik nalilerneqartassaaq, ineriartortitsinermilu suliaqarnertut aallaqqaasiutigalugu pilersinneqassalluni, tassani misilittakkat aqqissuussinerup aqqiiffigineqarnissaanut ataavartumik atorneqassallutik. Isumaqatigiissutit ataasiakkaat Peqqinnissaqarfiup danskillu napparsimmavissuisa akornanni isumaqatigiissutigineqassapput.

- 2. 2026-miit 2029-mut ukiut ataasiakkaarlugit sulisut qassit aammalu ulloq naallugu atorfiit qassit paarlakaattartunik aqqissuussinermut**

Ulloq: 25-08-2026
Suliap normua: 2026 - 14498
Allagaatip normua: 26757541

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@nanog.gl
www.naalakkersuisut.gl

ilaatinneqarnissaat naatsorsuutigineqarpa, suliamut ilinniagaqassutsinut, suliffinnut aammalu sulinnermut atatillugu Kalaallit Nunaanniinnerup sivilissusaanut agguarlugit?

Akissut

Peqqinnissaqarfiup paasissutissiinera naapertorlugu 2026-2029-mut sulisorisassat imaluunniit tamakkiisumik atorfiit katillugit amerlassusissaat pillugit ataatsimut aalajangersaasoqarsimanngilaq. Sulisunik pisariaqartitsineq aammalu paarlakaattartunik aaqqissuussinnermi isumaqatigiissut naapertorlugu, amerlassusiliineq ingerlaavartumik aalajangersarneqassaaq. Peqqinnissaqarfik siullertut assigiinngitsunik inuussutissarsiuteqartut akornanni tamakkiisumik atorfiit 36-t pisariaqartinneqartut nalunaarutigai. Atorfiit taakkua qanoq amerlatigisut aaqqissuussinnermit inuttalerneqarsinnaanersut suli ilisimaneqanngilaq.

Aaqqissuussineq maannamut nakorsanut, peqqissaasunut, ernisussiortunut, tarrarsuisartunut aammalu katsorsaanneri teknikikkut atortunik suliaqartartunut atuuppoq. Suliffissaq aammalu najukkamiinnissap sivilissusissaa immikkut aalajangersarneqassapput, taamaattorli siullermeertumik najukkamiinnerup sivikinnerpaamik sapaatit - akunnerinik 12-inik sivilissuseqarnissaa kiisalu kingorna najukkamiinnerit sivikinnerpaamik sapaatit - akunnerinik 6-8-nik sivilissuseqarnissaat anguniarneqarpoq.

- 3. Paarlakaattartunik aaqqissuussinnermi sulisut akissarsiat, soraarnerussutisiassat, bonusit, ineqarnermut, angalanermut aammalu atorfinitsitaanermut atatillugu atugassarititaasut allat suut atuuppat, aammalu aningaasartuutit ataasiakkaat kimit akilerneqassappat?**

Akissut

Sulisut Peqqinnissaqarfimmi piffissap aalajangersimasup iluani atuuttussamik atorfinitsinneqartarput, kalaallilu isumaqatigiissutaat atuuttut naapertorlugit akissarsiaqartinneqartarlutik. Atorfininnermut soraarnermullu atatillugu angalanerit Peqqinnissaqarfiup malittarisassai atuuttut naapertorlugit akilertarpei. Paarlakaattartunik aaqqissuussinnermi atorfinitsinneqarsimasunut atorfinitsiniarnermut attassiinnarnissamullu atatillugu tapiissutit kiisalu ukiumut bonusinik tunniussisoqarneq ajorpoq.

Danskit Nunap immikkoortuisa paarlakaattartunik aaqqissuussinnermut immikkut tapiissutit aningaasaliiffigai, matumani soraarnerussutisiassanut tapit 15 pct.-iusut imaluunniit ataasiartumik akissarsiatut tunniunneqarsinnaaneri periarfissaalluni. Taamatuttaaq Danskit Nunap immikkoortuisa najukkamiinnerup nalaani ineqartitsineq aningaasaliiffigaa. Ineqarneq Danmarkimi malittarisassat atuuttut naapertorlugit sulisumut akileraarusigaasumik sulisoqarnermi ajunngitsorsiassatut isigineqassaaq.

- 4. Paarlakaattartunik aaqqissuussineq 2026-miit 2029-mut ukiut ataasiakkaarlugit katillugit qanoq akeqarnissaa naatsorsuutigineqarpa, matumani ulloq naallugu atorfinnutaat ataatsimut aammalu nalunaaquttap akunneranut suliffiusumut aningaasartuutit ilanngullugit, Kalaallit Nunaata Namminersorlutik Oqartussaani, danskit naalagaaffiannit aammalu Danmarkimi regioninit akilerneqartussanut agguarlugit?**

Akissut

Aaqqissuussinerup Peqqinnissaqarfimmut aningaasartuuteqarnerunermik kinguneqarnissaa naatsorsuutigineqanngilaq.

Peqqinnissaq pillugu isumaqatigiissutip ilaa naapertorlugu, danskit naalagaaffiata aaqqissuussinerup atatillugu danskit aningaasartuutaasa aningaasalersornissaannut 2026-mut 10 mio. kr.-it kiisalu missingersuusiorfiusuni ukiuni tulluuttuni ukiumut 15 mio. kr.-it immikkoortinneqarput.

- 5. Paarlakaattartunik aaqqissuussinerup sulisut namminersortut sulisussarsiorfiit taartaasartunik, Namminersorlutik Oqartussat taartaasartunik imaluunniit atorfiit inuttaqanngitsut qanoq annertutigisumik taarserneqassappat, aammalu aningaasatigut sipaarutissat taartaasartunillu atuinerup qanoq annikillisinneqarnissaa naatsorsuutigineqarpa?**

Akissut

Paarlakaattartunik aaqqissuussineq, atorfinni aalajangersimasumik inuttalersoruminaatsunut, ullumikkut ilaatigut taartaasartut allaffeqarfiinut atorneqartartunut atorneqassaaq. Aaqqissuussineq aalajangersimasumik atorneqartunik taarsiissanngilaq, piffissallu ingerlanerani taartaasartut allaffeqarfiinik namminersortunik pisariaqartitsineq annikillisinneqassasoq naatsorsuutigineqarpoq.

Piffissaq ungasinnerusooq eqqarsaatigalugu aaqqissuussineq Peqqinnissaqarfimmi ukiumut 10-15 mio. kr.-it missaanni sipaaruteqarsinnaanissaa naatsorsuutigineqarpoq, taamaattorli taartaasartut allaffeqarfiinik atuineq qanoq annikillitigissanersoq sulii aalajangersimasumik naatsorsorneqarsinnaanngilaq.

- 6. Paarlakaattartunik aaqqissuussinerup sullissinerup ataqatigiinnera qanoq qulakkeerniassavaa, matumani sulisut taakkuujuartut suliffimmut tassunga uteqqittarnissaat ilanngullugu, aammalu ilisarititsineq, ilinniartitseqqaarneq suliassanillu tunniussineq qanoq aaqqissuunneqassappat?**

Akissut

Ataavartumik ingerlatsinerup qulakkeerneqarnissaa anguniarlugu danskit immikkoortortaqarfia ataaseq aallaavigalugu Kalaallit Nunaanni tamakkiisumik atorfiup aalajangersimasup assinganik isumaginnittassaaq, ataatsimullu aallartinneqartunik pilersaarusiortassalluni.

Najukkamik ilisimasaqarneq aammalu suleqatigeeriaatsit attatiinnarneqaqqullugit, sulisut ataasiakkaat suliffimmut aalajangersimasumut uteqqittarnissaat anguniarneqarpoq. Ilisarititsineq, sungiusarneq kiisalu suliassanik ingerlatitseqqiineq danskit kalaallillu immikkoortortaqarfiisa akornanni sulianut tunngasutigut qanimut suleqatigiinnikkut aaqqissuunneqarluni, matumani suliffimmi suliassanut ilitersuussinikkut, oqaloqatigiinnikkut ilisimasanillu avitseqatigiinnikkut.

- 7. Akuersissummut, suliamut atatillugu piginnaassutsinut, oqaatsinut kulturimillu paasinninnermut piumasaqaatit suut aalajangersarneqassappat, aammalu napparsimasut kalaallisut oqaasillit paasissutissanik paasinartunik aammalu piginnaasaqarluartumit nutserneqarnermik qanoq qulakkeerneqassappat?**

Akissut

Sulisut suliamut pineqartumut atatillugu allagartaat kiisalu suliamut tunngasumik piginnaasatigut piumasaqaatinut atuuttunut naammassinnissimasuussapput. Piginnaasatigut piumasaqaatit sukumiinerusut paarlakaattartunik aaqqissuussinnermut isumaqatigiissutini ataasiakkaani aalajangersarneqassapput. Sulisut allat kalaallisut tunuliaqutaqanngitsut oqaatsitigut kulturikkullu paasisimasaqarnissaat pingaartinneqassaaq, napparsimasullu kalaallisut oqaasillit pisariaqartitsineq naapertorlugu paasiuminartumik paasisutissinneqarnissaat piginnaasaqarluartumik oqalutseqarnikkut qulakkeerneqassaaq.

- 8. Naalakkersuisut paarlakaattartunik aaqqissuussinnerup aningaasaqarnermut, sulisoqarnermut, taartaasartunik atuinnermut, sullissinnerup ataqatigiinneranut, utaqqinnermut, katsorsaanernik taamaatitsinnermut, napparsimasut isumannaatsuunissaannut, oqaatsinut aammalu attaveqarnermut tunngatillugu inernerit qanoq qaqugulu nalilersussavaat tamanut saqqummiullugillu?**

Akissut

Aaqqissuussineq pillugu aqutsisoqatigiit, ukioq siulleq qaammatit pingasukkaarlugit killiffissiuqatigiillutik ataatsimiittassapput, tamatumalu kingorna ukiup affakkaartumik ataatsimiittarnikkut ingerlaavartumik malinnaavigissavaat. Illuatungeriit 2027-ip aallartisimalernerani killiffimmik ataatsimut naliliinissaat naatsorsuutigaat. Immikkut ittunik qanoq periuseqarluni imaluunniit ullumik inerniliussanik tamanut saqqummiussinissaq piffissami matumani aalajangersarneqanngilaq.

Naalakkersuisut peqqinnissaqarfiup inissisimanera ineriartorneralu pillugit Inatsisartut partiivisa Ilaqutariinnermut Peqqissutsimullu Ataatsimiititaliaq aqqutigalugu peqataatinneqarnissaat assut pingaartippaat, tamatumalu sulii salliutinneqartuarnissaa naatsorsuutigaat.

Inussiarnersumik



Anna Wangenheim